



SIDAAMU DAGOOMU QOQQOWI MOOTIMMA AFFINI GAAZEEXA

የሲዳማ ብሔራዊ ክልላዊ መንግሥት አፍኒ ጋዜጣ

SIDAAMA NATIONAL REGIONAL STATE AFFINI GAZETA

5^{ki} Diro Kiirro_____

Hawaasa, Maaja, 2017 M.D

Sidaamu Dagoomu Qoqqowi Mootimma
Amaalete Mini Allaalshi Hundaanni Fulinoho

በሲዳማ ብሔራዊ ክልላዊ መንግሥት ምክር
ቤት ጠባቂነት የወጣ

፩ኛ ዓመት ቁጥር_____

ሀምሌ፣ ፳፻፲፯ ዓ.ም

Amado

Gumulote Heddo Kiirro 53/2017

SIDAAMU DAGOOMU QOQQOWI MOOTIMMA HAWAASI QUCHUMI GIDDOOYIDI TANTANO WIRRO TANTANATE SHIQQINO GUMULOTE HEDO QOOLA

1. Bitima

Hawaasi Quchumi Sidaamu Dagoomi Qoqqowu Mootimma qara quchuma ikkasi deerrinni Qoqqowu poletiku, miinjuna gashshootu harinsho giddo qara woy mereersino qecha fulanno quchuma ikkinohuranna Quchumu gashshooti tantano ikkadimatenni qeechase fultanni noota marro buuxa Qoqqowu latishshira qara hajo ikkitinota ammannoonnihura; Hawaasi Quchumu gashshooti siinu Quchumi xaa yannara noosi tantano marro tantana woyyaabbino Owaante aate, gashshootu bilchaantera (administrative efficiency), Quchumu jiro taaloonyunni baalaho iillitanno gede(equitable access to urban resources), quchumunnita yanna yannate rahotenni lophitanni noo dagate Kiirro batinye baattote lopho ledumuu asse gashshate(alignment with the city's rapid demographic and spatial growth) yanna uyananikki hajo ikkitinota buunxoonnihura; Siinu quchumma wirro tantana baattote gashshootu, jirote beehache, xintu latishsha diriirsanna mootimma Owaante aamamooshshi aana heeko kalaqannohura Qoqqowu latishshu mixo, uurrishshuwatenna bajeettete hanqafu ledumuu yiino garinni harisa hasiissinota ammannoonnihura Hawaasi Quchumi giddooyidi tantano marro tantana hasiissino.

2. GUMULOTE HEDO HASIISHSHA

- 1) Qoqqowu bayiriidi seeri quwa 44 cinaancho quwa (1) hunda Qoqqowu Mootimma taqqa Qoqqowu, Zoonete, Quchumu, Woradunna Olluu gashshootinni tantanantanno yee woranno. Wole widoonni konni quwira cinaancho quwa (2) hunda Hawaasi quchumi amaalete mini hee'rannosihanna qoqqowu hundaanni galannoha ikke konni Bayriidi Seerinni tantanaminota xawise tittirsha seerunni murrannita woranno. Qoleno konni quwira cinaancho quwa (3) hunda quchumu gashshootu taqi tantano, biilloonyenna qeecha lainohunni tittirshu seerunni murrannita xawise worannohura;
- 2) Konni garinni Sadaasa 23/2014 M.D hanafe loosu aana hosinohu Sidaamu Dagoomu Qoqqowi Mootimma Quchumma Wirro Uurrisatenna Tantanate, Biilloonyensanna Loosu Qeechansa Murate Fulino Lallawi Kiir 20/2014 quwa 50 cinaancho quwa (9) hunda Quchummate deerru deerrunkunni heedhanno tantano xiinxallo assatenni Qoqqowu Gashshootu Amaale Minira shiqishshe gumulsiissanno, wonsiniro tantano diriirtannoha assitanno; ha'runsitanno yee Quchumunna Latishshinna Konstrakishiinete Biirora biilloonye uyino daafira;
- 3) Bocaasa 16/2017M.D hanafe loosu aana hosinohu Quchumate Pilaane Institiyute Biilloonyenna Loosu Qeecha Murate Fultino Wodho Kiir 44/2017'' quwa 6 cinaancho quwa (18) hunda Loosatenna owaante aate lifinxera injaanno gedexiinxallote aana xintantino garinni tantano woyeessate xiinxallo ha'rissegumulsiissanno, fajjinirono loosu aana hosiissanno yee qoqqowu pilaante inistitiyutera biilloonye uuyinota la'a dandiinoonnihura;
- 4) Quchumma Wirro Uurrisatenna Tantanate, Biilloonyensanna Loosu Qeechansa Murate Fulino Lallawa Kiir 20/2014 Loosu Aana Hosiisate Fultino Wodho Kiir 36/2016 quwa 30 cinaancho quwa (1) hunda Lallawaho quwa 24 kaiminni sina quchuma ikke tantanamate Rijiopolisete quchumira 130,000nna aleenni ikkitino daga heedhanno quchumi qooxeessi mitto sinu quchuma ikke tantanamanno yite xawisannohura;
- 5) Olluu tantano lainohunni Rijiopoolisete quchumira 30,000nna aleenni ikkitanno daga heedhanno quchumu qooxeessi mitto ollaa ikke tantanamanno yite tini Wodho quwa 30(2) hunda wortannohura;

- 6) Wodhote quwa 30 cinaancho quwa (3) hunda teessanote daga batinyi ajironna gashshootu owaantera injaannokiha ikke leelliro Quchumu Latishinna Konistrakishiinete Biir xiinxallote kaiminni sinu quchumi batinyi baxxino garinni gashshootu amaale minira shiqeenna gumullara dandiinanni yine wodhote quwa 30 cinaancho quwa (2) woroonni olluu teessano daga batinyi baxxino garinni gumulamara dandaannota xawisannohura;
- 7) Qachu tantano lainohunni wodhote quwa 30(4) hunda Rijiopoolisete quchumira 8,000 ikkitanno daga heedhanno quchumu qooxeessi mitto qacha ikke tantanamannota wodho wortanno. Qarqaru tantano lainohunni wodhote quwa 30 (5) hunda Rijiopoolisetenna deerra mittu quchumira 3,000 ikkitanno daga heedhanno quchumu qooxeessi mitto qarqara ikke tantanamanno yite wortannohura;
- 8) Siinu quchumi tantano giddo heedhanno mootimma loosu minna lainohunni wodhote quwa 31 cinaancho quwa (1) hunda Sinu quchumi amaale mini tantano noosikkiha ikke loosu massagamannoha ikkanno yite wortanno. Ledotenino konni quwira cinaancho quwa (3) hunda Rijiopolisete quchumma derra mittetenna deerra lamete uurranno mootimma uurrinsha tantano hasiissanno keeno wonshite afanturo sinu quchumira tantanama dandiitanno yite worte tittirshu biddissunni gumulamannota xawissannohura;
- 9) Wodhote quwa 37 hunda Quchumu Ollii Mootimma Uurrinshuwa Tantanonna Taqqa lainohunni quwa (1) Rijiopoolisete, deerra mitto, lamenna sasu quchummara quchumu ollii mootimma uurrinshuwa tantano lainohunni Songaafichu borro mini, Olluu gashshooti borro mini, Olluu maazzegaajju owaante borro mini, Wolootu jeefisiisaanote bissa borro minna hasiishshu garinni tantanantara dandiitannota xawissanno. Ledotenino lallawaho quwa 25 garinni Quchumu ollii mootimma gashshooti taqa ikke Quchumu ollii amaale mini, Olluu gashshooti amaale mininna Dagoomu yoote mini uurranno yee worannohura;
- 10) Quchumu Danna Bada lainohunni wodhote quwa 10 cinaancho quwa (1) hunda qoqqowu prezidaantichi riqiwino manchinni massagantanno komite iillitanno mittimma suumumenni bandanniha ikkannota xawissanno. Konni quwira cinaancho quwa (5) hunda pilaanete danni gashshootu danna sa’anno akati tuncu yiir balanxe gashshootu danna woyyeessine danna bada hasiissanno yee

worannohuranna tenne hajorano Hawaasi Quchumu Giddooyidi tantano wirro tantanate qoxeessaho noo Aliyye Zoone ledο danna xaaddanno hajubba noo daafira;

- 11) Wole widoonni quchummate karsama lainohunni lallawaho quwa 14(1) hunda Owaante aatenna gashshootamu loosi injora ammanoonniha ikkiro, teessaanote hasattonna suumummenna Biirο assitanno xiinxallo kaima assatenni hajo la'annosi quchumu amaale mininni buunxiro gutu danna noonsa quchumma karsiisa dandiinanni yee woranno. Qole cinaancho quwa (2) hunda Konni quwi cinaancho quwi (1) kaiminni gumuloonni quchummate karsama Biirote shiqqe qoqqowu gashshooti amaale mininni kaaja noosi, aye bisino uyinanni gumulo loosu aana hosiisate gadacho noosi yee worannohura;
- 12) Quchumu Amaale Mini Miilla Doorsha lainohunni Quchumu amaale mini doorshira quchumu gangaawinni haa'nanni riqiwamaanote kiirο qoqqowu gashshooti amaale mini quchumu afamanno zoone woy woradi gashshooti ledο amaalamatenni gumulliro loosu aana hosanno yee lallawu quwa 16(2) hunda worannohuranna Hawaasi Quchumi Giddooyidi Tantano Wirro Tantana Poletiku aana noosi heekko konni quwinni huwantoonnihura ;
- 13) Ikkinohura qoqqowu Jefisiisanote Amaale Mini Hawaasi Quchumu giddooyidi tantano wirro tantana woyyaabbino Owaante aate, gashshootu bilchaantera (administrative efficiency), Quchumu jiro taaloonyinni baalaho iillitanno gede assate yanna uyananikki hajo ikkase gashshootu amaale mininna deerra deerraho noo daga, hattono Hawaasi quchumi gashshooti Amaale Mininni wo'munni wo'ma ammanoonnihuranna **Qoqqowu Bayriidi Seeri quwa 48 hunda Amaale Mini Biilloonyenna Loosu Qeechi giddo cinaancho quwa (3) hunda Amaale Mini addi gari biilloonyi giddo fidaletе Kiirο (b) hunda 'Dagate batinye, qoqqowu hala'linye, dagoomunna miinju ikkito hedote giddo woratenni qoqqowu giddo wole gashshootu taqqa uurrisanno' yee Qoqqowu amaale minira biilloonye aanno.** Konni kaiminni Hawaasi quchumi giddooyidi tantano wirro tantanantanno gede konni woroonni noo gumulote hedonni gumuloonni.

3. Harancho Umo

Tenne gumulote hedο “**Hawaasi Quchumi Gashshooti Giddooyidi Tantano Wirro Tantante Qixxaabbino Gumulote Hedο Kiirο/2017**” yine su'misa dandiinanni.

4. Hexxo

Tenne gumulote hedo hexxo Hawaasi Quchumi Gashshooti Giddooyidi Tantano Wirro Tantanatenni gashshootu bilchaante lossate, mootimmate Owaante amamooshshe woyyeesatenna Quchumu gashshootu Qoqqowu latishshu mixo ledi sumuu assatenni seeru garinni afamooshshe aatenna massagete.

5. Hawaasi Quchumi Gashshooti Giddooyidi Tantano Wirro Tantana Lainohunni

Haaru garinni tantannoonniti Hawaasi quchumi giddoydi tantano 5 sinu quchummanni, 16 quchumu olluubbanninna 10 baadiyyete olluubbanni xaphoomunni 26 olluubbanni ikkana tittirshuno konni woroonni xawinsooniho

1) Taaboori Sinu Quchuma

- Worosiinni 5 quchumu olluubba amadannoha ikkana insano
 - Tullo ollaa;
 - Faaru ollaa;
 - Duume ollaa;
 - Hiixatu ollaanna;
 - Gudumaalu ollaa ikkitanno.

2) Shaafetu sinu quchuma

- Worosiinni 5 quchumu olluubba amadannoha ikkana insano
 - Sumudu ollaa;
 - Teesso ollaa;
 - Wuqiro ollaa;
 - Caffa Kotti-jaweessu ollaa
 - Guwe Istadiyeemete ollaa ikkitanno.

3) Daakate Sinu Quchuma

- Worosiinni 4 quchumu olluubba amadannoha ikkana insano:

- Hayiq Daarete ollaa;
- Filadelfiyu ollaa;
- Daato Odahe ollaa;
- Adaare ollaa ikkitanno.

4) Haweela Tuulate sinu quchuma

- Hundasiinni 7 baadiyyetenna 1 quchumu ollaa xaphoomunni 8 olluubba amadannoha ikkana insano:

- Tuulate quchumu ollaa;
- Allaamura baadiyyete ollaa;
- Caffaasine baadiyyete ollaa;
- Fiincaawa baadiyyete ollaa;
- Gaara riiqata baadiyyete ollaa;
- Gamaxo gale baadiyyete ollaa;
- Haranfama baadiyyete ollaa;
- Haweela wondi baadiyyete olluubba iikitanno

5) Hawaasa Laanganno Sinu Quchumi

- Hundasiinni 3 baadiyyetenna 1 quchumu ollaa xaphoomunni 4 olluubba amadannoha ikkana insano:

- Gaallo Argiisa quchumu ollaa;
- Saama Ejersa baadiyyete ollaa;
- Jaarra Damuwa baadiyyete ollaa;
- Galalcha Doore baadiyyete ollaa ikkitanno.

- 6) Sinu Quchummaranna Quchumu olluubbara Tantanantanno Mootimma Uurrinshuwa Lainohunni Gashshootu amaale mininni gumulantannoha ikkanno.

6. Gumulote Hedo Keeshshitanno Yanna

- 1) Tini gumulote hedo wolu garimma noosi seerinni woy gumulote hedonni shaaranta geeshsha loosu aana hossanno;
- 2) Wolu garimma noosi seeri fule loosu aana hosanno yannara tini gumulote hedo woyyaawe fulanno seeri biso ikkita kamaalantara dandiitanno.

7. Gumulote Hedo Loosu Aana Hossanno Yanna

Tini gumulote hedo Qoqqowu Amaale Mininni Kaajjitu **Maaja..., 2017 M.D** hanafe loosu aana hossanno.

Maaja....., 2017 M.D

Desta Ledamo

Sidaamu Dagoomu Qoqqowi Mootimma Prezidaante